

Hentam Dr M, DAP tak selesai masalah Melayu, kata Anwar
Free Malaysia Today
Dec 6, 2016

Anwar mengulas ucapan pemimpin Umno pada perhimpunan parti Ahad lalu yang tertumpu kepada Dr Mahathir dan DAP.

KUALA LUMPUR: Datuk Seri Anwar Ibrahim berkata Perhimpunan Agung Umno yang berakhir Sabtu lalu hanya menjadi medan menghentam DAP dan bekas perdana menteri Tun Dr Mahathir Mohamad, tanpa menyentuh isu melibatkan masyarakat Melayu.

“Menghentam Tun Mahathir, menghentam DAP, itu bukan jawapannya,” kata Anwar yang hadir di Mahkamah Rayuan Syariah semalam bagi mendengar rayuannya mengenai prosiding qazaf terhadap bekas pembantu pejabat PKR, Mohd Saiful Bukhari yang mendakwa diliwat.

Perhimpunan Umno kali ini menyaksikan tumpuan ucapan perwakilan terhadap Dr Mahathir kerana tindakan menjalinkan kerjasama dengan DAP.

Sayap Pemuda dan Wanita Umno turut berulang kali menyatakan kesetiaan kepada presiden parti, Datuk Seri Najib Razak, dalam apa yang dilihat pemerhati sebagai usaha memperkasakan kedudukannya ekoran tentangan daripada beberapa pemimpin veteran yang meninggalkan parti itu.

Anwar berkata beliau tidak menolak kedudukan Najib semakin kuat, tetapi ia hanya dalam lingkungan Umno.

“Dalam Umno, itu tidak menjadi isu.

“Di kalangan rakyat, isu utama adalah kenaikan harga barang dan inflasi,” kata Anwar.

Anwar berkata DAP seperti parti Pakatan Harapan lain sentiasa mempertahankan peruntukan dalam Perlembagaan Malaysia.

“Anda kerajaan. Kehilangan saham Melayu, tanah rizab Melayu, itu tanggungjawab anda.”

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/12/06/hentam-dr-m-dap-tak-selesai-masalah-melayu-kata-anwar/>